

4 Februari 2016

KENYATAAN MEDIA

oleh Dato' Ir. Jaseni Maidinsa,

Ketua Pegawai Eksekutif,

PBA Holdings Bhd (PBAHB) dan Perbadanan Bekalan Air Pulau Pinang Sdn Bhd (PBAPP)

PULAU PINANG MAHUKAN SKIM PEMINDAHAN AIR MENTAH, BUKANNYA AIR TERAWAT

PULAU PINANG, Khamis, 4/2/2016: Pulau Pinang memohon pelaksanaan segera Skim Pemindahan Air Mentah Sungai Perak (SPRWTS) oleh Kerajaan Persekutuan. Pulau Pinang juga tidak bercadang untuk membeli air terawat daripada Perak buat masa ini.

Terdapat empat alasan utama bagi pendirian ini:

1. SPRWTS adalah projek air mentah dan Kerajaan Persekutuan bertanggungjawab untuk projek air mentah.

Pada 2 Jun 2011, Perdana Menteri menyaksikan majlis menandatangani perjanjian di antara Kerajaan Negeri Pulau Pinang, Perbadanan Bekalan Air Pulau Pinang Sdn Bhd (PBAPP) dan Kerajaan Persekutuan untuk membolehkan Inisiatif Penstrukturan Semula Perkhidmatan Air Nasional (NWSRI) dilaksanakan.

Selaras dengan perjanjian-perjanjian ini, Kerajaan Persekutuan bertanggungjawab terhadap projek air mentah untuk manfaat Pulau Pinang dan rakyatnya. SPRWTS adalah projek air mentah.

Oleh itu, kos SPRWTS tidak patut ditanggung oleh rakyat Pulau Pinang atau Perak.

2. SPRWTS akan memberi manfaat kepada Pulau Pinang dan Perak.

Ketika ini, Sungai Perak tidak digunakan sepenuhnya sebagai sumber air mentah di kawasan utara Malaysia. Jika ada air mentah tambahan dari sungai ini, ia akan mengalir terus ke Selat Melaka.

Oleh itu, SPRWTS adalah cadangan skim antara-negeri baharu yang akan mengoptimumkan potensi Sungai Perak sebagai sumber air mentah.

Apabila dilaksanakan, SPRWTS akan membolehkan Pulau Pinang memanfaatkan sumber air mentah kedua, sekaligus mengurangkan risiko kekurangan air mentah ketika musim kering yang berpanjangan dalam zaman perubahan iklim kini.

Apabila direalisasikan, skim ini juga akan memberi manfaat kepada Perak kerana dapat mengekalkan bekalan air yang baik dan berterusan di Perak Utara.

3. Pembelian air terawat dari Perak adalah tidak praktikal dari sudut ekonomi.

Tarif purata domestik Pulau Pinang bagi 35,000 liter pertama sebulan ialah RM0.32 setiap 1,000 liter. Ini tarif purata yang terendah di Malaysia untuk *band* ini bagi penggunaan domestik. Setakat Disember 2015, tarif purata kebangsaan adalah RM0.69 setiap 1,000 liter, atau dua kali ganda lebih tinggi.

Bagi tarif perniagaan pula, tarif purata Pulau Pinang bagi 500,000 liter yang pertama sebulan adalah RM1.36 setiap 1,000 liter. Purata kebangsaan adalah RM1.48 setiap 1,000 liter. Tarif purata perniagaan kami untuk *band* ini bagi penggunaan perniagaan adalah lebih rendah daripada tarif purata perniagaan di negeri-negeri perindustrian lain seperti Kedah, Negeri Sembilan, Melaka, Selangor, Johor dan Perak.

Ketika ini, Perak mengenakan tarif purata RM0.73 setiap 1,000 liter bagi penggunaan domestik 35,000 liter yang pertama sebulan, berbanding RM0.32 di Pulau Pinang.

Perak juga mengenakan tarif perniagaan RM1.60 setiap 1,000 liter bagi penggunaan perniagaan 500,000 liter yang pertama sebulan, berbanding RM1.36 di Pulau Pinang.

Oleh sebab itu, adalah tidak praktikal dari sudut ekonomi bagi Pulau Pinang untuk membeli air terawat daripada Perak kerana tarif air Perak adalah lebih tinggi. Tambahan pula, kita juga perlu mengambil kira kos Perak membina infrastruktur bekalan air terawat untuk 'membekalkan' air ke Pulau Pinang.

4. Tidak ada amalan sebelum ini untuk pemindahan air terawat secara besar-besaran antara-negeri di Malaysia.

Skim air antara-negeri Johor-Melaka dan Pahang-Selangor melibatkan air mentah sahaja. Tiada sebab bagi Pulau Pinang untuk berhadapan dengan amalan diskriminasi berbanding negeri-negeri berkenaan apabila Kerajaan Persekutuan masuk campur untuk memastikan bekalan air yang baik merentasi negeri. Projek-projek ini diusahakan dan dilaksanakan oleh Kerajaan Persekutuan demi mengatasi senario kekurangan air di Malaysia. Pulau Pinang sepatutnya diberikan layanan yang sama dalam hal perolehan air mentah dan bayaran untuk air mentah ini sepatutnya ditetapkan pada kadar yang dibayar oleh Selangor atau Melaka.

Kami inginkan pertimbangan yang sama daripada agensi-agensi Persekutuan yang berkaitan untuk SPRWTS, satu skim yang akan mempertingkatkan jaminan air mentah yang mencukupi untuk Pulau Pinang dan Perak, demi menjaga kepentingan rakyat di kedua-dua negeri.

Oleh itu, terdapat alasan yang baik mengapa Perak harus menyokong permohonan Pulau Pinang untuk pelaksanaan SPRWTS, dan bukannya meminta kita untuk membeli air terawat. Kami berharap negeri jiran akan bersama-sama meminta Kerajaan Persekutuan melaksanakan projek ini secepat mungkin, demi keperluan masa depan bersama.

Berdasarkan unjuran bekalan air kita, SPRWTS sepatutnya bermula beberapa tahun yang lalu.

Akhir sekali, skim ini mesti dianggap sebagai satu komponen pembangunan yang penting, dan yang tidak boleh diabaikan, demi kejayaan Koridor Ekonomi Wilayah Utara (NCER) khususnya, dan negara kita amnya.

Dato' Ir. Jaseni Maidinsa,
Ketua Pegawai Eksekutif,
PBA Holdings Bhd (PBAHB) dan Perbadanan Bekalan Air Pulau Pinang Sdn Bhd (PBAPP)

Hubungi: Puan Syarifah Nasywa bt Syed Feisal Barakbah
Unit Komunikasi Korporat dan Pengurusan Acara
Tel : 04-200 6607
Email : syarifah@pba.com.my